

## SIADAW UKGAM (2)

Atunga ihgensa tawh kizom in tu in, anihna ihgen ding hi.

2. Tua Siadawpa (bishop) in, siampite ii naseppih natawh, tuucing nasep sem (to shepherd) hi (Can. 369).

Siampi te ii naseppih natawh tuucingpi pa ahi, Siadaw pa in Pasian minam khenkhat (a portion of the people of God) uk a, tua pen Siadaw Ukgam (diocese) kici hi. Siampi suahna sacramentu hangin, siampite in, siampiza akicing anei ahi siadawpi pa tawh, siampi innkuan khat (one presbyterium) ahihi (LG 28). Tua siampi te in, amau te tungah Khutngakna tawh akipia, siampi suahna Sacramentu ii vangliatna hangin leh tua Sacramentu pana angahuh, siampi nasepna thuneihna (the ministry) hangin, siadaw innkuan (body of bishops) sungah kihel uhhi. Tua ahiah manin, amaute in, tuucing leh lutang Christu Topa ii nasep ahi thuhilh nasep (teaching office), siampi nasep (priestly office) leh thuneihna nasep (ahiah keileh) ukna nasep (kingly office) anei siadaw innkuan sungah kihel uhhi (cf. LG 28).

Hi thu hangin, Siadaw pi pa thuneihna nuai ah, amaute khutsungah aki ap Topa' tuu te ahi thu-um leh thuzuimite pen, Pasian' deihna bangin asiantosakna (to sanctify) leh ukin, acin akepna (governing) tawh, siampite in, athuthuk Pawlpi ii lim leh mel kilangkhasak uhhi (cf. LG 28). Tua bangin, singlamteh puakawmin nakpi'n na hongsepna uhhangin, Christu Topa' Pumpi ahi Pawlpi (Eph 4:12) kilamtohna ah, siampite in genzawhloh alamdang innlamte honghi uhhi.

Ahi zongin, siampite in siadaw pa nasemte (servants of the bishop) hilo hi. Nungzuipi te zalaihpa ahi, siadaw pa ii thuneihna nuai ah Pasian siampi nasep asemte ahi uhhi. Siadaw pa in, ama siampiza pen siampite tungah ahawmsawn ahi kei hi. Ahi zongin, ama tunga om, Christu Topa' siampiza

ahi, akicing siampiza leh siampi naseptheihna thuneihna (fullness of priesthood and divine mission) sungah siampite akihel (participate) ahihi (PO; Presbyterorum Ordinis 2, footnote 16). Siadaw pa leh siampite in aneihuh siampiza pen atawntung siampi lianpa ahi Christu Topa ii aneih siampi za pan hongluangkha ahihi. Ahi zongin hisung munah telding athupi mahmah khat omhi. Siadawte leh siampite in, atawntung siampi lianpa ahi Christu Topa ii siampiza neikhawm uha, ahi zongin, aneihzah uh leh aneihzia uh kibang lo hi (not in the same degree).

Pa Pasion in amah asawl mahbangteek in, Christu Topa in a nungzuipi te hongasawl hi (apostolic ministry). Tua nungzuipi te tungah atawntung siampi lianpa ahi Christu Topa' neih siampiza khempueh akicingin oma, tua akicing siampiza (fullness of priesthood) pen nungzuipi te zalaih ahi Siadawpi te bekin nei hi (Cf. PO 2, and LG 21). Nungzuipi te leh amaute zalaih ahi siadawpi te ii sawltaaknasep (apostolic ministry) apicintheih semsem nading leh hoihphataka gual zawhna angahtheih nadingin, siadawte ii sawltaaknasep ahuhding in naseppih (co-workers) ding mipawlkhat nateel in, tua mite pen siampi (in the order of priesthood) nasuaksak hi (cf. PO 2). Tua siampite in sawltaakte (apostles) hi lo ahiah manun, Christu Topa' neih aliansiampiza pen akicingin neilo uha, sawltaakte zalaih ahi siadawte bekin anei ahihi. Tua ahiah manin, Christu Topa ii atawntung siampi lianza akicinga anei siadawte' sawltaaknasep asepa ah (apostolic ministerial role), siampite in aciangkhat tawh in (with limitation) kihelna angah ahi uhhi (Their ministerial role has been handed down to the priests in a limited degree) (PO 2).

Mazai keekluatzong ma kitunlo theizaw ahiahmanin, ihma ngawpin ihzialbawl tadinghi. Siadaw ukgam ihcih in mun le mual leh minam tunga kiphut gamhilo a, upna tungah kiphutgam hi cihthu ihthei khinhi. Tua upna in leipan hong lipokhiat hilo in, vanpan hong kumsuk ahizaw hi. Topa Jesu in tua upna tawh kilam gam aphutding in vanpan hongkum ahihi.

Tua upna gam hongphutkhia in, amah in innkiu suangbulpi hong suaka (Mt 21:42, Sawltak 4:11), tua upna tawh akilam innpi pen Pasian mai ah akipawntung innpi ahi dingin khuampi ahi, nungzuipi sawm le nih te tungah hong lamhi (Mangmuhna 21:14, cf. Eph 2:20). Nungzuipi te zalaihna thu leh nungzuipi te tawh kizopna (apostolic succession and apostolic continuity) cihthu hisungmun ah thuthuktak leh tangzai taka ih muhtheihding athupi penpen khat ahihi.

Nungzuipi te zalaih ahi siadaw pa in, upna khuampi ahihi. Tua thuhangin, siadaw ukgam sungah, Pawlpi tawhkisai in sepding bawlding te siadawpa lungkimpiah lo in, seploh bawl loh ding thu Pawlpi kipat tungpek in Christian masa te tungah naki hihkhin hi (St Ignatius of Antioch). Banghanghiam ihcih ciangin, nungzuipi te zalaih siadawte in, Pasian mai ah upna tawh akilam innpi ahi Pawlpi ii khuampi te ahihman ahihi. Khuampi kihello in, kuamah in innlamthei lo hi. Tua mah bangin upna tawh akilam innpi ahi Pawlpi pen upna khuampi ahi siadawpa kihello, ama lungkimpiah lo in kilamthei lo cihna ahihi.

Siadawte bek in upna tawhakilam pawlpi lamdinghi ihci hetkei hi. Siadawpa lungkimpiah lo in kilamtheilo hi ihci bekhi. Banghanghiam cihleh amah in upna khuam ahih manhi ihci khin hi. Tua thuhangin, siadawkhat in ama ukna gamsung a om, thu-um leh thuzui te tungah upna leh gamtat natawh kisai (Faith and moral) in, thuneihna sangpen anei pa ahihi. Tua hi leh ama tuucing nasep pen, siampi te ii seppihna (co-operation) kisam ding hiam ci in dotnop huai hi. Siampite ihcih in, atawntung alian siampiza ahi, Christu Topa ii siampiza sungah aciang khattawh kihela, Siadawte in tua alian siampiza acingtak in aneite ahih manin, tua siampiza anei tegel in nasemkhawm in, Christu Topa ii tuucing leh atawn tung siampi lianpa ahihna kilangsak uhhi. Siampiza namnih omlo a, Christu Topa' neih siampiza khatbek omhi. Khatbek ahi, tua Christu ii siampiza pen akicingtakin apna angah mi leh aciangkhat tawh apna angahmi te pen siadaw innkuan (body of

bishops) ih ci hi. “Siadawte tawh kigawmkhawm in, siampite in khatbek ahi Christu Topa ii siampiza leh siampi nasep neikhawm uhhi. Hi khatbek ahi Christu siampiza sungah siampiza angahna uh thuhangin leh khatbek ahi sawltak nasep (mission) angahna uhhangin, siampite in siadawte tawh tung siah kizop-kipumkhatna (hierarchical communion) aneih akul ahihi” (PO. 7).

Siadaw innkuan (the body of bishops) sungah siampite zongkihel ahihmanin siampite nasepna in, siadaw nasepna hong suak hi. Tua siadawpa in Christu Topa munla in, siampi te in nungzui pi temun la uhhi (St Ignatius of Antioch). Lam khatpan genleng, siadaw ukgam khatah, siadaw pa leh siampi te in, Christu Topa leh anungzuipi te lim le mel pua hi. Hi thuthuk in Siangthopumpi biakpiak natungah zungkha in kiptakin kiphut hi.

Abbreviation:

LG: *Lumen Gentium*; Vatican II's Dogmatic Constitution on the Church. *Pawlpi Thu Hilhna*

PO: *Prebyterorum Ordinis*; Vatican II's Decree on the Ministry and Life of Priests . *Siampi te Nasepna leh Nuntak nading tawh kisai Hilhna*